

# *Jahresbericht 2016 vor Trachtegruppe Gurzele*

*Ds Jahr 2016 faht glich a wi di letschte,  
nämlech mit Sitzige vo der  
Liederkommission u vom Vorstand!*

*Wie auí Jahr het di Berneschi  
Trachtevereinigung BTV im Januar a  
drüne Wuchenänd Tanzkürs z' Lyss  
organisiert. Vo Gurzele het a dene Aläss  
í däm Jahr niemer teil gno.*

*Die erschtí Singprob ísch am 13. Januar  
gsí! Mir sí mit vieu Fröid druflos für z  
Repertoír ufzfrüsche u nöü Lieder z  
lehre.*

*Der 29. Januar ísch z Datum vo üser  
Hauptversammlig.  
Es ísch aus guet gange, mir sí zügig  
dertür cho!*

D Versammlig het beschlosse nöü Hemli  
a zschaffe!

Drufache hi mir du e Uswahu Hemli u  
Bluse la cho bim Märthüslü Ballenberg  
Brienzwiler.

Das het veiechli z diskutiere gäh was  
me jetz da für eis wet näh.

Zletscht hi mir üs du fürs blaue Eduwiss  
was nöi git entschiende!

I gloube es si jetz auü z friede mit der  
Wahu.



Der 3. Februar isch Beerdigung gsi vo  
mire Schwiegermueter! Z Chörli isch mit  
versterkig vo Mitglieder vom Jodlerklub  
Thun Heimelig cho singe i d Chiuche!  
So isch di Abdankig ganz i Grossi's Sinn  
gsi.

Danke a dere Steu no inisch vieu mau!

Am 14. Februar hi d Christine, Käthi u  
Hanny d Delegierterversammlung vom  
BKJV in Herzogenbuchse bsuecht!  
Schön, dass dir z Chörli verträte hit!

Am 15. Februar hi mir üsi Tanzprob ir  
Stiftig Uetendorfberg düregeführt. Das  
isch für us äs sehr bsungrigs Erläbniss  
gsy. Mir hei dene Lüt dert ä grossi Fröid  
chönne mache u sie hei ou tou mit  
ghoufe tanze. Die Tanzübung hei mir im  
Juni o no mau wiederhout.

Delegierterversammlung vom Gürbetal  
Jodlerverein isch am 11. März z Toffe  
gsi. Thomas, Christine, Reto u Ig hi  
teilgno. Mir hi du grad gmerkt, das  
eigentlich nume zwöi iglade wäre gsi!  
D Christine u Tanja hi sich aus Duett la  
ufnääh!

Bim erschte Tanze Mittenand sie sehr  
vii vo üsere Tanzgruppe drbi gsy. Das  
isch z' Kehrsatz gsy. A de angere zwöi  
hei Daniela u dr Aschi teilgno.

Ad Delegierterversammlung z' Thörishus  
am 11. März isch d Silvia gange. Dert  
erfahrt me was aus so dürs Jahr louft.  
Ungerangerem isch äs grosses Thema z  
Unspunnenfest z' Interlake im 2017 gsy.

Üses Trachte z Morge het am 20. März  
statt gfunde.

Das isch gäng für auí e grosse Aufwand!

Es isch aber o schön vo de Gescht z  
ghöre wie fein u gross z Angebot sig u si  
gniesses sehr!

Danke öich Aune füre Isatz u o der  
Musig es härzlechs danke schön für d  
Umrahmig vo däm Tag!

Am Regionauträge z' Wattenwil hei sie  
sehr viu Tanz tanzet wo mir gar nit hei  
kennt. So sie mir gar nit so zum tanze  
cho u das hei mir chli schad gfunge.  
Bim ine cho het Silvia bi ihrne  
Trachteschuhe Gummine verlore u de  
hei mir no müesse Tanzschuhe  
organisiere. Die Schuhe sie ihre aber  
viu z gross gsy u de isch sie du grad  
froh gsy, dass sie nit so viu het müesse  
tanze.

O i däm Jahr hi mir wieder törfe häufe  
z Jantar Konzärt düreführe!  
Mir hi aber nid nume d  
Feschtwirtschaft gführt, nei mir vom

Chörlí hí o törfe Ufträtte u häufe dä  
Abe abwächsligsrüch z gschtaute.  
Tanzfroue sí du bim Serviere u í der  
Chuchi ígschprunge.

Üsí Lisabeth Fankhauser  
(Ehremitglied) ísch am 12. April 70.  
Jahr aut worde!  
Z Fescht het du am 17. April bí  
Haldemanns stattgfunde!  
I ha mit der Schwiegertochter z  
Dientige telefoniert u organisiert das  
es e Überraschig wär we mir chömme  
cho singe!  
Ja glubsch du!!!!  
D Lisebeth wis afe wie dä Charre luft bí  
üs u het du aglüte u gfragt wie, wo,  
wenn! Sí wet de öpis la gäh u üs nid  
eifach wieder hí schicke nam singe!  
I glube aber d Lisebeth het glich Früd  
gha das mir sí cho, o wes ke  
Überraschig ísch gsí!

Dank em Thomas Bühlmann hi mir am  
24. April z' Seftige i der Unihockey  
Arena zu der Mobiliar a Buureevent  
dörfe ga 8 Lieder singe!

Es isch leider i dere Haue chli mühsam  
gsi zum singe u d Lüt hi nid vieu ghört  
we si nid grad i der nechí si gsi!

Mir si aber sehr verwöhnt worde u hi e  
zfriedene Sunntig erläbt.

Oh i diesem Jahr hei üsi beide Kathrins  
Trachtebott z' Sumiswald bsuecht. Nach  
däm Alass hei sie üs wichtigí

Informatione id Gruppe bracht. Sie hei  
dert ä schöne Tag dörfe verbringe. A  
dere Steu möchte mir ihne beidne ganz  
härzlech Merci säge, dass sie dert hei  
teilgnoe.

Üse Tanzma dr Aschí het Gurzeler bim  
festleche Tanzabe im Casino z' Bern  
verträte. Das isch am 21. Mai gsy.

Ds Stäffisburg het vom 3. bis 5. Juni ds  
Bärner Kantonale Jodlerfescht  
stattgfunde. Ga singe si mir mit em  
Chörlí nid, aber 11 Mitglieder si ga  
häufe. Das isch ganz e gueti Sach gsi!  
No besser wärs bi schönem, trochenem  
Wätter gsi.

D Heilsarmee Gurzele het am 12. Juni  
der 120. Geburtstag gfüret mit e me  
Solidaritäts Fest für Haiti. Auí  
Dorfvereine si iglade worde für mit z  
mache.

Am Morge hets e Fír mit Rückblick uf  
die 120 Jahr gä wo mir hi törfe singe u  
tanze!

Bi Spies u Trank hi mir nahr chönne  
zäme si u jede Verein user üser  
Tanzfroue, het no mau chönne  
ufträtte!



Das isch e Alass mit säuteheitswärt we  
Gurzele Vereine inisch auí bí nang sí!!!

Üse Brätliabe isch í däm Jahr chli  
angers düregführt worde!

Mir sí nämlech uf Schwarzeburg ga  
Armbuschtschiesse.

Mit ungerstützig vo de Armbuschschütze  
Schwarzeburg wo Peter Burri derbí isch  
hí mir auí törfe schiesse.

Sogar d Spitzeschützin Irene Beyeler  
het zigt wie das me muess u zwar ganz  
ruhig u geduldig.

Zletscht hets du o e Ranglische gä.

Erscht isch Rohrer Ernst worde mit 56  
Punkt. Zweit Nussbaum Walter 54 Punkt  
u dritt d Rothacher Therese 52 Punkt.  
Der Ruefer Hanspeter het o 52 Punkt  
gha aber kes 10.

Aschliessend sí mir du no verwöhnt  
worde mit eme feine Nachtässe.

Das isch e glungne Abe gsi u doch  
inisch öpis angers.

Nach de Ferie hi mir du a de Lieder für z Gürbetaler Jodlerträffe müesse schaffe. Das isch am 4. Septämber z Riggisbärg gsi.

Samstag, Sonntag 24. u 25. September isch z Datum vo üser Vereinsreis.

Mit em Chauffeur Trachsel Walter vo Engelochs si mir am Samschtig Morge Richtung Toggenburg gschtartet. In Alt St. Johann si mir uf z Sässeli bis Alp Sellamatt. E Gruppe het dert im Bärgrestaurant z Mittag gässe u die angere hi d Wanderig Klangwäg gschtartet.

Wit si mir du aber no nid cho wieu der Hunger üs plaget het u mir z Pic Nic hi binis gha.

Früsch gschterkt si mir witer uf däm interessante Klangwäg.

Mit em Sässeli si mir wieder is Tal uf  
Wildhaus cho. Hie im Hotäu Sunne si  
mir Übernachtet.

Nach e me feine Nachtässe u vieu singe  
hi mir du no müesse i d Bar züggle.

Wo du d Lisabeth isch i d Bar cho het si  
verzeit das ihrí bluti Frou im Bett no  
öpis hät wöue wo mit S afat u mit X  
ufhört! Si hig ihre du gsit mi chönn der  
Spitex jetzt nimm alite si müess warte  
bis am Morge!

Da hi mir üs du fasch nimm chönne  
erhole vor lache!!!

Am nächschte Morge isch üsi Reis  
witergange nach Seegräben ufe  
Juckerhof. Die Farbepracht vo Chüurbse  
isch sehr Idrücklech gsi u o die schöni  
Lage oberhaub vom Pfäffikersee aber o  
die viele viele Lüt wo auí ihre  
Sunntigsusflug mit Kind und Kegel dert  
häre hi gmacht.

Im Namittag si mir du witer Richtung  
Ämmítáu. Z Sumiswaud im Bäre hi mir

no z Nacht gässe u si du mit voue Büch  
gäge Gurzele zue.

Es isch e abwächsligsrüchi Reís gsi bi  
wunderschönem Wätter.

Am 23. Oktober isch z Chörli wie jedes  
Jahr i der Chiuche zum  
Ärntedankgottesdiensch ga singe.

D Silvia het am 3. November ar  
Präsidentenkonferenz im Kreuz z' Belp  
teilgnoe. Das isch immer sehr  
interessant fürne Gedankeustusch.

Am Tanzleiterträffe am 6. November sie  
z erscht mau ou Seeländer drbi gsy.

Dirigänte u Presidänte si am 14.  
Novämber o vom BKJV z Thun Expo  
zume Infoabe zäme gno worde. Z  
Hanny u I si ga lose was es nöis git.

E Vortrag über Vereinsführig, z nöische vom Lotteriefond u Infos zum Jubiläum vom BKJV alässlech vom Unspunnefescht sí so di wichtigschte Punkte gsi.

Am 24. Novämber ísch d Houptprob vo üsne Ungerhautigsabe gsi.

Mir vom Chörlí hí du gmerkt das ds Lied Bär Gandacht eifach no gäng nid Uftritt rüf ísch u hí du grad bschlosse das uszwächsle. Mach z Beschte drus het grad am beschte passt u Barbara het das bim asäge grad guet chönne begründe.

Für Tanzlüüt ísch z Ämmitaler Ländlerquintett Eggwil grad cho häufe, dass de am Samschtig aus so klappt wie Daniela das wünscht.

O Theaterlüüt hí natürlech scho aus gäh u mir his gnosse.

Der 26. Novämber, der 1. u 3. Dezämber sí Datum vo üsne Abe!

Am erschte Samschtig isch z Hanny nid  
da gsi wieu äs bim

Kinderwiehnachtsmusikel Jimmy Flitz  
het chönne mitmache! D Silvia Wenger  
isch üs cho häufe bim iturne u asinge.

Es isch a dene drei Abe aune Gruppe  
guet gange! D Gescht hi grühmt u his  
gnosse.

O nach em Programm isch aus ribigslos  
gange! Es brucht eifach auí für di Abe  
düre z führe u o no üser Froue u Manne  
derzue. I danke aune ganz härzlech  
füre gross Isatz! Mi cha sich eifach uf  
öich verlah.

D Auterswiehnachte hi mir mit de  
Schüler u em Pfarrer Kaltenrieder am  
14. Dezämber zäme düregführt. Es si  
gwüss veiechli Seniore cho u hi Früd  
gha a däm Programm. D schüler hi das  
hür guet gmacht, das si Auí hi ibezoge  
bim singe.

Ds Paschtetli zum z Nacht het  
natürlech o nid törfe fähle u o d  
Gschänksäckli wärde gäng gärn gnoh.

E Fondue Abe bi Künzis z Wattwil isch  
üse Autjahrshöck am 29.12.2016 gsi. D  
Regina u der Johann mit Hüf vo der  
Madlen u em Martin hi üs wieder so  
richtig verwöhnt. Das Fondue vo der  
Grundbachchäsi isch super guet gsi u z  
Dessärbuffet vo der Regina natürlech o.  
Es isch e schöne gmühtleche Abe gsi wi  
gäng bi Künzis.

I däm Jahr 2016 isch z Chörli 49 mau  
zäme cho, dadervo si d HV, z Trachte z  
Morge, u 9 Uftritte gsi. Zusätzlech no  
der Budeabe vo der Tanja u ei  
Beärdigung.

I wet a dere Steu üser Dirigäntin  
Hanny Burri ganz härzlech danke für

dä gross Isatz für üses Chörlí dūr z ganze Jahr. Es ísch schön bísch du üsí Dirigäntí!

Tanzgruppe ísch 35 mau zäme cho, dadervo sí d HV, z Trachte z Morge, 4 Uftritte, Tanzen mítenand u der Uetedorfbärg gsí.

Üsem Tanzleiterpaar Daniela u Ernst Rohrer danke í ganz hárzlech für dá gross Isatz dūr z ganze Jahr. Dir machet das super!

Mír Tanzfroue wete dir Daniela u dir Ernst ganz, ganz hárzlech Merci säge für dí enormí Geduld wo dir geng für üs ufbrínget. Äs macht eifach Spass mít öích zäme z'Tanze. Mír fröie üs immer ufe Mántig.

Ou erwähne möchte mír, dass mír stouz sie so ä tollí Tanzgruppe dörfe sie. U drum ísches ou öfters vor cho, dass mír nach der Übig no eís zäme sí ga trinke,



was ou üsere Kollegschaft immer gut  
het da.

Danke wet í Öich aune für e guet  
Bsuech vo de Probe u füre gross Isatz bi  
de Aläss.

Es isch schön we gäng auí enang häufe!

Der Lieder- u Theaterkommission u de  
Rächnigsrevisore o es grosses Merci für  
öü Arbeit.

U z letscht es ganz grosses Merci a miní  
Vorstandslüt. Es isch dankbar mit öich  
zäme dä Verein z leite.

Für z nöie Vereinsjahr wünsche í öich  
gueti Gsundheit u mängs schöns Zämesí  
mit der Trachtegruppe.

Gurzele im Jäner 2017  
Öü Präsidentin  
Marianne Reust

